



東華續錄

光緒四十九

臣朱壽朋敬編

臣汪錫增恭校

秋七月乙酉朔諭張家口監督英文奏差滿回京虧短盈餘銀兩請減成賠繳一摺著戶部核議具奏○時享 太廟遣載敦恭代行禮○裕祿奏查明七年分奏銷案內未完一分以上各員職名並續完銀數下部議奏○裕祿奏安省被災州縣現辦賑撫情形並宣城等處續被水災緣由得 旨覽奏已悉先後被災州縣情形甚重小民蕩析離居深堪憫惻著卽提撥鉅款督飭委員紳士分投賑卹毋稍遲誤並將一切應辦事宜實心經理以資拯救沿江圩堤務當實力保護仍隨時將辦理情形據實具奏○丙戌諭戶部奏遵議耀年所交右翼監督盈餘銀兩一摺所交盈餘銀兩十七兩零著交廣儲司耀年短收額內盈餘銀兩應得處分著加恩寬免○諭戶部奏遵議已故左翼監督熙拉布所交盈餘銀兩一摺所交盈餘銀兩一千二百六十一兩零著交廣儲司熙拉布短收盈餘銀兩應得處分著加恩寬免其應賠銀兩並著加恩免其賠繳○諭巡視東城御史阿彥泰等奏匪棍潛逃所遺房屋請旨辦理一摺倉匪張六卽張鳳儀畏罪潛逃久未弋獲著步軍統領衙門順天府五城御史一體勒限嚴拿務獲送部究辦該犯所

遺房屋等項著戶部會同該城御史查收入官○陳士杰奏辦理紹屬西江水災並借款修築石塘要工報聞○己丑以文暉爲都察院左副都御史○獎安插耿馬土族出力官紳熊昭鏡等○劉長佑奏停止捐輸所有空白執照一律清釐嚴防假冒報聞○庚寅諭給事中樓譽普奏浙江杭州等府同被水災請飭速籌撫卹一摺前據陳士杰奏杭嘉湖各府屬雨水過多田禾被淹飭令該地方官確切履勘妥爲安撫茲據該給事中奏稱本年五月下旬餘杭縣之苕溪水勢驟漲衝坍塘堤田廬被淹臨安於潛等縣均發蛟水仁和錢塘二縣農田亦被浸灌湖州府屬之霅溪同時泛溢嘉興府屬之海塘決口多處以致各州縣同被水患等語覽奏被災情形甚重殊堪軫惻著陳士杰迅速派員會同各該州縣勘明被災地方妥籌撫恤分別辦理毋任失所用副軫念民艱至意○諭丁寶楨奏查明敘永廳等處被災情形分別酌量撫恤等語本年夏間四川敘永涪州彭水奉節巫山綦江等處大雨冰雹河水陡漲衝沒田廬淹斃人口並資州所屬地方不戒於火延燒民房二百餘戶覽奏實深憫惻業經該督委員會同各該地方官查勘被災輕重分別籌款賑濟卽著督飭認真撫恤毋令一夫失所用副軫念災黎至意○諭丁寶楨奏參劾知縣請旨革職等語四川什邡縣知縣張惟一徇縱書役不念民隱且於酌定差規一事故違功令幾釀事端辦理釐局委員候補知縣徐世潢屢次舞弊追經追查竟敢抗置不理張惟一徐世潢均著卽行

革職以肅吏治○予捐助地方義舉新河縣已故監生高寬及孫高凌高通旌獎○壬辰恆訓馮譽驥溥英聯恩奏操練兵丁技藝漸就嫺熟藉可兼興文教擬援案變通將盤屋縣西雅柏鎮濱臨渭河一帶留牧廠地試辦開墾招佃取租提充書院經費得 旨如所請行○甲午孫詒經奏八旗屯居童生來京報考向無文憑恐不免有朦混之弊請飭下八旗都統內務府三旗暨五旗包衣專管大臣明定章程妥議具奏著爲定例 上諭順天學政孫詒經奏考試八旗屯居童生請飭明定章程一摺著禮部議奏○允文緒奏請安插黑龍江私墾流民繩丈升科○陳士杰奏護送琉球遭風難民報聞○乙未任道鎔奏黃水盛漲歷城等屬籌辦工撫情形得 旨覽奏已悉卽著督飭印委各員勘明被災輕重情形分別工賑奏明辦理○以楊玉科捐建江甯官地鋪屋交部核獎○免天津海防盛軍馬礮隊各營採買戰馬關稅○裁吉林黑龍江交界卡倫二十六處專歸練隊巡緝○丙申諭御史謝謙亨奏閩省教官於歲科兩試新進童生勒索修費威嚇凌辱各生補廩充貢選拔舉優均須議明規費並於諸生戶婚詞訟輒行羈押需索請飭查禁等語教官勒索規禮干預詞訟例禁綦嚴若如所奏殊屬不成事體著該督撫會同學政嚴行禁止此等積弊他省恐亦不免並著各直省督撫學政申明例禁加意訪查如有前項弊端卽將該教官嚴行參辦以肅功令○諭御史李肇錫奏大臣濫保人員請予申儆一摺已革山西冀寧道王定安

前經曾國荃保薦擢用乃竟至貪黷營私種種荒謬該督保舉非人自有應得之咎曾國荃著交部議處嗣後中外大臣務當懷遵迭次諭旨切實保舉不得徒採虛聲甚至徇私濫保致干咎戾用副朝廷延攬人才綜核名實至意○諭御史李肇錫奏山東各州縣開徵糧票先由糧差領出該戶尙未交糧糧差輒爲代納事後加倍取償未饜所欲卽稟官追押恣其魚肉地方官庇役責民以致胥役日橫等語錢糧爲維正之供豈容胥役藉端需索貽累閭閻著任道鎔嚴行查禁如有糧差代墊索費經該糧戶告發卽行懲辦地方官不得稍涉徇縱此等弊端他省恐亦不免並著各督撫一體查禁以懲蠹役而恤民生○戊戌左宗棠奏竄屬泰州等州縣興建倉頡祠工竣請加封號下禮部議奏○卹吐魯番古城陣亡員弁祥奎等○卹殉難濟木薩參將倭質○頒給馬蘭峪城外五神祠匾額○己亥 上詣 奉先殿 壽皇殿行禮○庚子諭誠端等奏瀝陳並無私收地租革退陵戶各情係知州宋文縱串役民朱藝等捏詞誣控請派員查究等語明陵附近開墾地畝各節前據張樹聲等查明具奏並准戶部議覆此次誠端所奏是否屬實著畢道遠周家楣確切查明據實具奏○辛丑 上詣 奉先殿 壽皇殿行禮○丁寶楨奏呈四川鹽法志書下戶部核議具奏○諭前據都察院奏浙江道員王蔭樾以查荒被毆一案撫臣並未傳訊該道亦未輸服等詞赴該衙門呈訴當諭令陳士杰據實覆奏茲據奏稱前次業將莊書王陸沅等分

別問擬並將知府許瑤光等奏請交部察議當查辦時王蔭樾求見經該撫傳問開導該道面稱如此辦理亦其所願等語此案王蔭樾因公受辱已將官民等分別懲處究竟該道辦理亦涉操切業經奏結何得屢次瀆控著仍照陳士杰前奏所擬完結所請飭交閩浙總督再行查辦之處著毋庸議○諭奕謨等奏拿獲擅入闕左門人犯請交部治罪一摺禁城重地理宜嚴肅乃本月十六日夜間竟有人犯向萬軒在闕左門迤東值房牆上行走實屬膽玩向萬軒著交刑部訊明從重治罪另片奏闕左門迤東值房應由太常寺管理稽查等語著該衙門堂官查明辦理○頒給湖北黃陂縣城隍廟及木蘭山神廟匾額○癸卯李暎奏治鹺惟在疏銷舊引積滯新引無可議增此理之一定不易者也兩江督臣左宗棠請復引岸始本受蔽於奸商既而仰體聖廑會商核奪足見顧全大局之深心毫無膠執顧其事一發而難收所不能曲爲維持者勢也夫政戒紛更法宜明備與其頻年口舌紛紜殊有損國家政體何如及時折衷定論予勳臣以轉旋之策示商民以平準之經查楚岸原有應復引岸故衆口因而交爭此次新商請加楚引至十五萬之多究其實則現繳四成票費約六十萬金耳以楚岸舊商引價每季向合萬金之說比而計之僅可加引三萬誠照此數明定限制准楚岸新商三萬引之請則新引不至有患多之病揆之楚中銷數情形亦未必萬分窒礙厥後引岸如能漸復引額不妨遞增票有常價業可相安而善後

要需其得資挹注者益非淺鮮是一酌濟間而數善備焉矣如果新商以利微本重爲嫌卽請勒令楚岸舊商認捐六十萬金歸還新商撤銷新商引票准楚岸舊商領加三萬引既不至巨款無著亦以徵權衡之大公也至於皖岸辰岸等處本無未復引岸銷路何由擴充新加引票應盡撤銷現繳票費無幾儘可發還以免新舊同困之虞臣伏思古人堅僻之強每以有激而成近日南來士大夫及都中留心時局諸臣靡不請求至此臣諒度所及據實直陳仰懇 聖裁明斷 諭令左宗棠懷遵辦理並請 飭部著爲定章庶幾政令永肅實效徐收矣 上諭御史李暎奏准鹽增引亟宜設法維持一摺著戶部議奏○予提督宋慶之母劉氏旌表○衛榮光奏人材之興資乎學術而學術之盛賴乎儒師 國朝崇尚正學作興宇內凡高材碩儒積學砥行足爲士林矜式者一經臣工上請悉蒙 恩賜褒獎所以端學術勵人材誠鉅典也茲有前詹事府左春坊左中允劉熙載官居侍從曾值 內廷受累 朝之知過視學廣東自引疾告歸後主講上海龍門書院計十四年師道卓然教澤甚著至光緒七年二月初三日在籍病故學者惜之據江蘇紳士前陝西按察使王承基等暨龍門書院肄業舉貢生監臚陳事實請據情援案具奏卽經批司查明詳辦去後茲據江甯布政使梁肇煌蘇州布政使譚鈞培覆核轉詳請奏前來臣查劉熙載揚州府興化縣人少孤力學刻意以古人自期道光二十四年成進士供職翰林風裁峻絕一介不苟

糲食藿羹敝衣徒步有人所不能堪者處之晏如研究諸經博觀子史於天文地理律呂音韻六書九數以及諸家方術靡不涉獵卒之由博返約粹然一出於正咸豐三年 召入上書房行走敬慎供職三年如一日 文宗顯皇帝嘉之 御賜性靜情逸四字六年 京察一等以道府用旋因病乞歸前湖北巡撫臣胡林翼疏薦之稱其貞介絕俗學冠時人同治三年 召至京授國子監司業遷左春坊左中允督學頗東勤於其職作懲忿室欲遷善改過四箴示諸生曰士學聖賢當先從事於此逾年復引疾歸襍被如故不名一錢其上海之龍門書院者前江蘇臬司應寶時任蘇松太道時所創不課舉業教諸生讀書勵行期爲實學劉熙載旣主講席以身爲教正而不迂覓而不弛日月有課出入有稽講貫問答娓娓不倦說經不分漢宋論道必宗程朱隨才引掖多所成就吳越之士聞風來學前後著錄者數百人及其病歿諸生千里赴弔莫不哀慟其感人如此少壯所著書有藝概六卷四音定切四卷說文雙聲二卷說文疊韻二卷昨非集四卷晚年刊華就實不事著述惟持志塾言二卷則自言所得以教子弟者語皆篤實切於日用跡其生平介潔之操固天下所共推而品學之端毫無瑕疵不愧純儒伏查前大理寺卿李聯琇主講江甯鍾山書院有年身故後經前督臣沈葆楨奏請宣付史館列入儒林傳奉 旨允准今該故中允教思覃敷聲望尤著可否仰懇 天恩俯准將左春坊左中允劉熙載生平學行事蹟宣付國史館

列入儒林傳以爲積學砥行者勸出自 聖裁 上諭衛榮光奏請將已故儒臣宣付史館一摺原任詹事府左春坊左中允劉熙載前在上書房行走曾仕廣東學政旋因患病開缺主講上海龍門書院品學純粹以身爲教成就甚多洵足爲士林表率該故員學行事蹟著宣付國史館列入儒林傳以彰碩學○甲辰諭溥廉等奏庫存祭品虧短並自請從重治罪一摺本年五月間 裕陵純惠皇貴妃園寢甫經被竊乃本月查點祭品又復短少一十餘件之多該管大臣等所司何事實屬咎無可辭溥廉榮毓桂昂著交各該衙門嚴加議處其掌守人員及值班官兵著查明分別參辦並著順天府五城直隸總督各飭所屬將兩次賊犯一併勒限緝拿務獲嚴行懲辦○予天津縣孝子張淦劉士琨旌表○乙巳諭御史陳啟泰奏條陳興利除弊事宜一摺著各該衙門議奏○諭吏部奏遵議大員處分一摺前任山西巡撫現兩廣總督曾國荃應得降二級調用處分著加恩改爲革職留任○諭朕奉 慈禧端佑康頤昭豫莊誠皇太后懿旨兩月以來迭據各省奏報水災詳加披閱時切廑懷因思安徽浙江江西被災最重漂沒田廬淹斃人口之處甚多小民困苦情形尤屬可憫深宮焦念寢饋難安雖經各該撫籌款賑恤誠恐力難遍及不能普濟災黎所有安徽浙江江西三省著戶部各撥銀六萬兩以資賑濟即將本年中秋節應進貢內款項撥抵應用無庸呈進猶恐由部發往緩不濟急卽著由各該省應解京餉項下就近劃扣俾災民

得以早沾實惠其餘江蘇山東湖北四川福建陝西等省均有被災之處卽著各該省覓籌款項妥爲撫恤欽此各該督撫務當嚴飭所屬將所撥銀兩核實散放毋任一夫失所以副 皇太后節用推恩勤恤民隱至意○丙午何璟奏海山下游溪河驟被風水坍塌房屋撞壞船隻淹斃德國女孩派委查勘分別辦理得 旨覽奏殊堪憫惻卽著督飭卽委各員認真查勘妥籌撫恤毋任失所此外有無被災之處並著一體查明具奏○丁未劉錦棠奏臣等承准軍機大臣字寄光緒八年三月十七日奉 上諭譚鍾麟奏籌度新疆南路情形一摺所稱酌度七城廣狹繁簡設立丞倅牧令一員更於喀什噶爾阿克蘇兩處各設巡道一員如鎮迪道之例著劉錦棠體察情形會商該督妥議具奏等因欽此仰見 朝廷眷顧西陲動規久遠之至意跪聆之餘莫名欽感伏念新疆當久亂積罷之後今昔情形判若天壤所有邊疆一切事宜無論拘泥成法於時勢多不相宜且承平年間舊制亂後蕩然無存萬難再圖規復欲爲一勞永逸之計固除增設郡縣別無良策種種情由經大學士前任陝甘督臣左宗棠迭次奏明有案仰蒙 聖明洞鑒准其因時制宜在事諸臣先後稟承 宸謨籌辦善後諸務罔敢稍涉疏懈現在地利日闢戶口日增各族漸知向化諸事均有成效郡縣之設時不可失茲奉 旨命臣等會商妥議久安長治之基實肇於此自當就愚慮所及熟籌審度以期妥協而垂永久謹按經野建官之道必量其地之民力物產足

以完納 國課又可供給官吏胥役而有餘然後視其形勢之衝僻繁簡設官以治之非從寬預爲計畫則官困而民必受其害故新疆添置郡縣設官未可過多此必然之勢也惟南路各城人民較多腴區較廣其轄境之最遼闊者縱橫至數千里少亦數百里若設官太少又慮鞭長莫及難資治理不足爲經久定制臣鍾麟原奏內有一城不過數十莊不及東南一小縣七城各設一官足矣等語經臣錦棠就近體察情形此說蓋亦不盡然又臣鍾麟原奏將吐魯番作爲南路城池因有七城設官之議臣錦棠查吐魯番現不在八城數內自吐魯番城以西喀喇沙爾庫車阿克蘇烏什是爲南路東四城葉爾羌喀喇沙爾英吉沙爾和闐是爲南路西四城應統八城通盤籌畫一律改設郡縣以上各節經臣錦棠臣鍾麟往復函商意見相合公同酌議除自哈密南至吐魯番北境至精河應暫照臣鍾麟原奏無須另設多員外回疆東四城擬設巡道一員駐紮阿克蘇該道以守兼巡爲兵備道督飭所屬水利屯墾錢穀刑名事件撫馭蒙部彈壓布魯特稽查卡倫作爲衝煩疲三項要缺喀喇沙爾與土爾扈特和碩特游牧地方犬牙相錯每有交涉事件擬設直隸廳理事撫民同知一員治喀喇沙爾城庫車擬設直隸廳撫民同知一員治庫車城阿克蘇爲古溫宿國擬設溫宿直隸州知州一員治阿克蘇城拜城縣知縣一員治拜城歸溫宿直隸州管轄烏什緊鄰布魯特部落爲極邊衝要擬設直隸廳撫民同知一員治烏什城以上各廳州縣

應統歸東四城巡道管轄回疆西四城擬設巡道一員駐紮喀什噶爾回城該道以守兼巡爲兵備道管理通商事宜督飭所屬水利屯墾錢穀刑名諸務彈壓布魯特稽查卡倫作爲衝煩疲難請 旨最要缺喀什噶爾爲古疏勒國擬設疏勒直隸州知州一員治漢城疏附縣知縣一員治回城歸疏勒直隸州管轄英吉沙爾緊鄰布魯特爲極邊衝要情形與烏什略同擬設直隸廳撫彝同知一員治英吉沙爾城葉爾羌爲古莎車國擬設莎車直隸州知州一員治漢城葉城縣知縣一員治回城歸莎車直隸州管轄葉爾羌所屬瑪喇巴什一城爲回疆東西咽喉要地積年河水爲患必須置員撫治擬設直隸廳水利撫民通判一員治瑪喇巴什城和闐爲古于闐國擬設和闐直隸州知州一員治和闐城于闐縣知縣一員治哈拉喀什地方歸和闐直隸州管轄以上各廳州縣應統歸西四城巡道管轄凡茲建置大略較之光緒六年四月十八日左宗棠奏擬設立各官稍爲簡省較之臣鍾麟原奏七城各設一官之議略爲加增斟酌損益務適於中冀免流弊而成永圖至於佐雜人員應俟郡縣設定由道員及各丞倅牧令就近察酌地方情形將其必不可少者詳請奏設其各廳州縣疆界應俟立官畫分後再行奏咨各處地方暫時責成諸軍統領營官督率營勇駐防俟兵制議定再行奏請設立總兵副將參遊都守千把等官其餘未盡事宜統候陸續籌議隨時奏請 睿裁又奏新疆各城向設阿奇木伯克等員其職銜有三四品者現議

建置郡縣擬設丞倅牧令各員官階既非甚崇若回官仍循舊章殊有枝大於本之嫌似宜量爲變通以歸妥善郡縣設定後擬將回官各缺暨阿奇木伯克等名目概行裁去各廳州縣另行酌設頭目額數略如各省辦公紳士不可以官目之遇有缺額卽行就地選舉出具切實考語詳由該管道轉請邊疆大臣發給委牌惟須照回官向例撥給地畝作爲辦公薪資免滋需索侵吞諸弊又南路纏回愚懦者居其大半彼教中所謂條勒阿渾往往捏造邪說肆其誘脅之術人心易爲搖惑禍亂每由此起纏回語言文字本與滿漢不同遇有訟獄徵收各事件官民隔閡不通阿奇木伯克通事人等得以從中舞弊是非被以文教無由除彼錮習自全疆戡定以來各城分設義塾令回童讀書識字學習華語其中亦多聰穎可造之資授之以經輒能背誦學寫楷書居然端好爲之講解義理亦頗能領會足見秉彝之良無分中外雖不必侈言化民成俗而其效已有可觀此時建置南路郡縣教職等官暫可不設惟宜設法鼓勵使回族爭奮於學庶教化可期漸興所有原設各塾應由各廳州縣延師訓課以小學孝經論語孟子大學中庸詩經易經春秋教各回童擬每歲合各廳州縣考試一次有能誦習一經熟諳華語者不拘人數多寡卽送該管道衙門覆試詳由邊疆大員援照保舉武弁之例咨部給予生監頂戴待其年已長大卽准充當頭目如有勤學不倦能多習一經或數經者無論已未充當頭目均准各廳州縣考送由道覆試請獎再

行遞換五品以下各項頂戴仍不得逾六品以示限制惟曾任三四五品阿奇木伯克者裁缺後仍應准其照舊戴用翎頂充當頭目其各項頂戴頭目人等如果承辦差使異常出力仍隨時酌量保奏懇 恩賞給三四五品頂戴用昭激勸又奏查光緒六年大學士前陝甘督臣左宗棠奏稱將來議設行省必以哈密劃隸新疆形勢始合哈密及鎮迪道所屬文武地方均應歸劉錦棠統轄所有升調補署考核及一切興革事宜均可就近辦理分別奏咨陝甘總督無庸兼管等因光緒六年十一月初四日奉 上諭左宗棠奏請將哈密鎮迪道歸劉錦棠統轄等語等因欽此欽遵在案伏念新疆改設行省之議左宗棠實始發之查本年三月十六日陝甘督臣譚鍾麟奏籌度新疆南路情形摺內亦有設立行省當從州縣辦起然後遞設督撫以統轄之等語蓋新疆本秦隴之屏障燕晉之藩籬亟宜經營盡善以固吾圉然舊制既不可復自不得不另籌善策左宗棠譚鍾麟所議改設行省固無非維持永久之謀至臣愚慮所及則與左宗棠等不能盡同有不容不及時陳明者臣自曩歲出關辦賊洎於今已歷七載熟度關外情形求所以長治久安之道固舍設郡縣易舊制別鮮良圖此臣之所見與左宗棠等相同者也惟將新疆另爲一省則臣頗以爲不然現在臣等擬設之南路各廳州縣合之哈密及鎮迪道等處原有各廳州縣總共不過三十餘處卽將來地方日益富庶所增亦必無多查光緒六年四月十八日左宗棠覆陳新疆宜

建行省開設郡縣摺內所載擬設及原有各屬廳州縣亦不過二三十處嘗考各省中郡縣之最少者莫如貴州廣西等處新疆則尙不能及其一半其難自成一省情形亦已明矣且新疆之與甘肅形同唇齒從前左宗棠以陝甘總督督辦新疆軍務凡籌兵籌餉以及製辦轉運諸務皆以關內爲根本其勢順故其事易舉臣之才力資望萬不逮左宗棠而自受代以來兩年之間雖無功過足錄然未至僨事者皆賴譚鍾麟楊昌濬誼篤公忠力顧全局故能勉力支持向使甘省大吏稍存畛域之見則邊事已不堪問若將關內外劃爲兩省以三十餘州縣孤懸絕域其勢難以自存且後路轉餉製械諸務必將與甘肅分門別戶以清眉目所需經費較目前必更浩繁其將何以爲繼故新疆甘肅勢難分爲兩省此臣之所見與左宗棠等不同者也又臣閱譚鍾麟原奏籌度新疆南路情形摺稿議將北路鎮迪等處暨擬設南路郡縣皆歸 欽差大臣統轄謹按 欽差大臣本非國家常設之官且哈密及鎮迪一道原係奉 旨暫歸

微臣統轄現既議設南路郡縣必須熟籌可久之道不得仍作權宜之計以郡縣設定後諸事須照各省辦法而言例章則臣營無舊案可稽言用人則軍中無合例堪以補署之員至於錢糧刑名升遷調補諸事又無藩臬兩司可專責成似茲窒礙難行之處未可枚舉微臣之愚擬請將哈密鎮迪道等處暨議設南路各廳州縣併歸甘肅爲一省惟歸甘督遙制竊恐鞭長莫及擬仿照江蘇建置大略添設甘肅巡撫

一員駐紮烏魯木齊管轄哈密以西南北兩路各道驛州縣並請 賞加兵部尚書銜俾得統轄全疆官兵督辦邊防並設甘肅關外等處地方布政使一員隨巡撫駐紮舊有鎮迪道擬請援照福建臺灣道之例 賞加按察使銜令其兼管全疆刑名驛傳事務改迪化直隸州知州爲迪化縣添設迪化府知府一員治迪化城管轄迪化昌吉綏來阜康奇台五縣似此辦理實較另爲一省稍免煩費而於新疆時事亦甚相宜如蒙 聖明准行仰懇 簡巡撫藩司及擬設之南路兩道員以便及早措置壹是現在伊犁既經收還分界亦不久可以竣事沿邊無警防務解嚴如設巡撫則 欽差大臣儘可裁撤臣擬俟巡撫西來當舉關外一切情形詳細告知並將經手事件交其接辦再行呈繳關防仍俟臣足疾醫治全愈後卽當束裝北上以伸累載戀闕之忱蓋新疆蕩平經六年之久此時軍務日鬆急宜定大局以修政理臣於吏治嚮少閱歷關外郡縣諸事宜多係創始斷非軍旅粗才所能了局區區愚悃實恐貽誤將來並非意存規避此不能不預先瀝陳者也又奏哈密以西各滿營旗丁亂後子遺僅存舊制萬難規復卽以古城烏魯木齊兩處言之前此古城領隊大臣勝安由京西來道出哈密與臣談及古城滿營房屋久已鞠爲茂草該處旗丁總共不過十數人勝安自以補授斯缺原應卽行赴任究竟古城無隊可領無營署可住進退維谷殊形狼狽臣比屬其與金順恭鏜熟商自處之道悵然踰天山北去臣於光緒二年夏秋

之交率師克復烏魯木齊其時滿城傾圮瓦礫荒涼未見旗丁一人嗣臣進克南路各城始將旗丁之被賊裹脅者陸續拔出咨送烏魯木齊安插然爲數亦屬無多故以恭鏗之精明強幹世受國恩銳意欲有所爲以圖報稱然所管旗丁只有此數雖都統有兼轄鎮迪道之責而政務亦甚簡少不足以發揮其才氣他如哈密辦事臣明春所部健銳威儀各營已奏明全行裁撤其所轄回務亦經左宗棠奏准歸哈密通判管理欽遵在案竊國家建官分職原各有分內應辦之事現在新疆時事變遷都統及辦事領隊各大臣兵少事簡幾無異投閑置散此不但非朝廷設官之意亦諸臣心所不安也如蒙聖明體察臣言准照擬設甘肅巡撫之議則烏魯木齊自須設立撫標官兵南北兩路均宜另設額兵添置總兵副將參遊都守千把等官以爲永遠邊防之計烏魯木齊提督應移駐喀什噶爾城以扼要害吐魯番暨南路舊有參贊辦事領隊各大臣員缺固可一律裁去卽自哈密北至伊犁所有都統暨辦事領隊各大臣員缺亦宜酌量裁撤巴里坤古城烏魯木齊庫爾喀拉烏蘇等處所餘旗丁如目前之零星分布終恐無濟實用不如併歸伊犁滿營生聚教訓以期漸成勁旅查承平時新疆南北兩路係歸伊犁將軍總統烏魯木齊都統亦兼轄鎮迪一道如設巡撫不但鎮迪道無須都統兼轄卽將軍亦無庸總統全疆免致政出多門巡撫事權不一其伊犁滿營似應改照各省駐防將軍營制從新整頓務求精實可用庶於邊防